

# 论语

孔子及其弟子语录的汇编

◎学而篇第一 .....	2
◎为政篇第二 .....	4
◎八佾篇第三 .....	6
◎里仁篇第四 .....	9
◎公冶长篇第五 .....	11
◎雍也篇第六 .....	14
◎述而篇第七 .....	17
◎泰伯篇第八 .....	20
◎子罕篇第九 .....	22
◎乡党篇第十 .....	25
◎先进篇第十一 .....	28
◎颜渊篇第十二 .....	32
◎子路篇第十三 .....	35
◎宪问篇第十四 .....	39
◎卫灵公篇第十五 .....	44
◎季氏篇第十六 .....	47
◎阳货篇第十七 .....	50
◎微子篇第十八 .....	54
◎子张篇第十九 .....	56
◎尧曰篇第二十 .....	59

## ◎学而篇第一

(一)子曰：“学而时习之，不亦说乎？有朋自远方来，不亦乐乎？人不知而不愠，不亦君子乎？”

(二)有子曰：“其为人也孝弟，而好犯上者，鲜矣；不好犯上，而好作乱者，未之有也。君子务本，本立而道生。孝弟也者，其为仁之本与！”

(三)子曰：“巧言令色，鲜矣仁！”

(四)曾子曰：“吾日三省吾身：为人谋而不忠乎？与朋友交而不信乎？传不习乎？”

(五)子曰：“道千乘之国，敬事而信，节用而爱人，使民以时。”

(六)子曰：“弟子，入则孝，出则悌，谨而信，泛爱众，而亲仁。行有余力，则以学文。”

(七)子夏曰：“贤贤易色；事父母，能竭其力；事君，能致其身；与朋友交，言而有信。虽曰未学，吾必谓之学矣。”

(八)子曰：“君子不重，则不威；学则不固。主忠信，无友不如己者。过则勿惮改。”

(九)曾子曰：“慎终追远，民德归厚矣。”

(十)子禽问于子贡曰：“夫子至于是邦也，必闻其政，求之与？抑与之与？”子贡曰：“夫子温、良、恭、俭、让以得之。夫子之求之也，其诸异乎人之求之与？”

(十一)子曰：“父在，观其志；父没，观其行；三年无改于父之道，可谓孝矣。”

(十二)有子曰：“礼之用，和为贵。先王之道，斯为美；小大由之。有所不行，知和而和，不以礼节之，亦不可行也。”

(十三)有子曰：“信近于义，言可复也。恭近于礼，远耻辱也。因不失其亲，亦可宗也。”

(十四)子曰：“君子食无求饱，居无求安，敏于事而慎于言，就有道而正焉，可谓好学也已。”

(十五)子贡曰：“贫而无谄，富而无骄，何如？”子曰：“可也。未若贫而乐，富而好礼者也。”子贡曰：“《诗》云：『如切如磋，如琢如磨』，其斯之谓与？”子曰：“赐也，始可与言《诗》已矣，告诸往而知来者。”

(十六)子曰：“不患人之不己知，患不知人也。”

## ◎为政篇第二

(一)子曰：“为政以德，譬如北辰，居其所而众星共之。”

(二)子曰：“《诗》三百，一言以蔽之，曰：『思无邪。』”

(三)子曰：“道之以政，齐之以刑，民免而无耻；道之以德，齐之以礼，有耻且格。”

(四)子曰：“吾十有五而志于学，三十而立，四十而不惑，五十而知天命，六十而耳顺，七十而从心所欲，不逾矩。”

(五)孟懿子问孝。子曰：“无违。”樊迟御，子告之曰：“孟孙问孝于我，我对曰，无违。”樊迟曰：“何谓也？”子曰：“生，事之以礼；死，葬之以礼，祭之以礼。”

(六)孟武伯问孝。子曰：“父母唯其疾之忧。”

(七)子游问孝。子曰：“今之孝者，是谓能养。至于犬马，皆能有养；不敬，何以别乎？”

(八)子夏问孝。子曰：“色难。有事，弟子服其劳；有酒食，先生馔，曾是以为孝乎？”

(九)子曰：“吾与回言终日，不违，如愚。退而省其私，亦足以发，回也不愚。”

(十)子曰：“视其所以，观其所由，察其所安。人焉廋哉？人焉廋哉？”

(十一)子曰：“温故而知新，可以为师矣。”

(十二)子曰：“君子不器。”

(十三)子贡问君子。子曰：“先行其言而后从之。”

(十四)子曰：“君子周而不比，小人比而不周。”

(十五)子曰：“学而不思则罔，思而不学则殆。”

(十六)子曰：“攻乎异端，斯害也已。”

(十七)子曰：“由！诲女知之乎！知之为知之，不知为不知，是知也。”

(十八)子张学干禄。子曰：“多闻阙疑，慎言其余，则寡尤。多见阙殆，慎行其余，则寡悔。言寡尤，行寡悔，禄在其中矣。”

(十九)哀公问曰：“何为则民服？”孔子对曰：“举直错诸枉，则民服；举枉错诸直，则民不服。”

(廿)季康子问：“使民敬、忠以劝，如之何？”子曰：“临之以庄，则敬；孝慈，则忠；举善而教不能，则劝。”

(廿一)或谓孔子曰：“子奚不为政？”子曰：“《书》云：『孝乎！惟孝，友于兄弟，施于有政。』是亦为政，奚其为为政？”

(廿二)子曰：“人而无信，不知其可也。大车无輓，小车无軌，其何以行之哉？”

(廿三)子张问：“十世可知也？”子曰：“殷因于夏礼，所损益，可知也；周因于殷礼，所损益，可知也。其或继周者，虽百世，可知也。”

(廿四)子曰：“非其鬼而祭之，谄也。见义不为，无勇也。”

### ◎八佾篇第三

(一)孔子谓季氏：“八佾舞于庭，是可忍也，孰不可忍也？”

(二)三家者以《雍》彻。子曰：“『相维辟公，天子穆穆』，奚取于三家之堂？”

(三)子曰：“人而不仁，如礼何？人而不仁，如乐何？”

(四)林放问礼之本。子曰：“大哉问！礼，与其奢也，宁俭；丧，与其易也，宁戚。”

(五)子曰：“夷狄之有君，不如诸夏之亡也。”

(六)季氏旅于泰山。子谓冉有曰：“女弗能救与？”对曰：“不能。”子曰：“呜呼！曾谓泰山不如林放乎？”

(七)子曰：“君子无所争。必也射乎！揖让而升，下而饮。其争也君子。”

(八)子夏问曰：“『巧笑倩兮，美目盼兮，素以为绚兮。』何谓也？”子曰：“绘事后素。”曰：“礼后乎？”子曰：“起予者商也！始可与言《诗》已矣。”

(九)子曰：“夏礼，吾能言之，杞不足征也；殷礼，吾能言之，宋不足征也。文献不足故也。足，则吾能征之矣。”

(十)子曰：“自既灌而往者，吾不欲观之矣。”

(十一)或问禘之说。子曰：“不知也，知其说者之于天下也，其如示诸斯乎！”指其掌。

(十二)祭如在，祭神如神在。子曰：“吾不与祭，如不祭。”

(十三)王孙贾问曰：“与其媚于奥，宁媚于灶，何谓也？”子曰：“不然。获罪于天，无所祷也。”

(十四)子曰：“周监于二代，郁郁乎文哉！吾从周。”

(十五)子入太庙，每事问。或曰：“孰谓鄫人之子知礼乎？入太庙，每事问。”子闻之，曰：“是礼也。”

(十六)子曰：“射不主皮，为力不同科，古之道也。”

(十七)子贡欲去告朔之饩羊。子曰：“赐也！尔爱其羊，我爱其礼。”

(十八)子曰：“事君尽礼，人以为谄也。”

(十九)定公问：“君使臣，臣事君，如之何？”孔子对曰：“君使臣以礼，臣事君以忠。”

(廿)子曰：“《关雎》，乐而不淫，哀而不伤。”

(廿一)哀公问社于宰我。宰我对曰：“夏后氏以松，殷人以柏，周人以栗，曰，使民战栗。”子闻之，曰：“成事不说，遂事不谏，既往不咎。”

(廿二)子曰：“管仲之器小哉！”或曰：“管仲俭乎？”曰：“管氏有三归，官事不摄，焉得俭？”“然则管仲知礼乎？”曰：“邦君树塞门，管氏亦树塞门。邦君为两君之好，有反坫，管氏亦有反坫。管氏而知礼，孰不知礼？”

(廿三)子语鲁大师乐，曰：“乐其可知也：始作，翕如也；从之一，

纯如也，皦如也，绎如也，以成。”

(廿四) 仪封人请见，曰：“君子之至于斯也，吾未尝不得见也。”从者见之。出曰：“二三子何患于丧乎？天下之无道也久矣，天将以夫子为木铎。”

(廿五) 子谓《韶》：“尽美矣，又尽善也。”谓《武》：“尽美矣，未尽善也。”

(廿六) 子曰：“居上不宽，为礼不敬，临丧不哀，吾何以观之哉？”。



## ◎里仁篇第四

(一)子曰：“里仁为美。择不处仁，焉得知？”

(二)子曰：“不仁者不可以久处约，不可以长处乐。仁者安仁，知者利仁。”

(三)子曰：“唯仁者能好人，能恶人。”

(四)子曰：“苟志于仁矣，无恶也。”

(五)子曰：“富与贵，是人之所欲也。不以其道得之，不处也。贫与贱，是人之所恶也。不以其道得之，不去也。君子去仁，恶乎成名？君子无终食之间违仁，造次必于是，颠沛必于是。”

(六)子曰：“我未见好仁者，恶不仁者。好仁者，无以尚之；恶不仁者，其为仁矣，不使不仁者加乎其身。有能一日用其力于仁矣乎？我未见力不足者。盖有之矣，我未之见也。”

(七)子曰：“人之过也，各于其党。观过，斯知仁矣。”

(八)子曰：“朝闻道，夕死可矣。”

(九)子曰：“士志于道，而耻恶衣恶食者，未足与议也。”

(十)子曰：“君子之于天下也，无适也，无莫也，义之与比。”

(十一)子曰：“君子怀德，小人怀土；君子怀刑，小人怀惠。”

(十二)子曰：“放于利而行，多怨。”

(十三)子曰：“能以礼让为国乎，何有？不能以礼让为国，如礼何？”

(十四)子曰：“不患无位，患所以立。不患莫己知，求为可知也。”

- (十五)子曰：“参乎！吾道一以贯之。”曾子曰：“唯。”子出， 门人问曰：“何谓也？”曾子曰：“夫子之道，忠恕而已矣。”
- (十六)子曰：“君子喻于义，小人喻于利。”
- (十七)子曰：“见贤思齐焉，见不贤而内自省也。”
- (十八)子曰：“事父母几谏，见志不从，又敬不违，劳而不怨。”
- (十九)子曰：“父母在，不远游，游必有方。”
- (廿)子曰：“三年无改于父之道，可谓孝矣。”
- (廿一)子曰：“父母之年，不可不知也。一则以喜，一则以惧。”
- (廿二)子曰：“古者言之不出，耻躬之不逮也。”
- (廿三)子曰：“以约失之者鲜矣。”
- (廿四)子曰：“君子欲讷于言而敏于行。”
- (廿五)子曰：“德不孤，必有邻。”
- (廿六)子游曰：“事君数，斯辱矣；朋友数，斯疏矣。”

## ◎公冶长篇第五

(一)子谓公冶长：“可妻也。虽在縲紲之中，非其罪也。”以其子妻之。

(二)子谓南容：“邦有道，不废；邦无道，免于刑戮。”以其兄之子妻之。

(三)子谓子贱：“君子哉若人！鲁无君子者，斯焉取斯？”

(四)子贡问曰：“赐也何如？”子曰：“女，器也。”曰：“何器也？”曰：“瑚璉也。”

(五)或曰：“雍也仁而不佞。”子曰：“焉用佞？御人以口给，屡憎于人。不知其仁，焉用佞？”

(六)子使漆雕开仕。对曰：“吾斯之未能信。”子说。

(七)子曰：“道不行，乘桴浮于海。从我者，其由与？”子路闻之喜。子曰：“由也好勇过我，无所取材。”

(八)孟武伯问：“子路仁乎？”子曰：“不知也。”又问。子曰：“由也，千乘之国，可使治其赋也，不知其仁也。”“求也何如？”子曰：“求也，千室之邑，百乘之家，可使为之宰也，不知其仁也。”“赤也何如？”子曰：“赤也，束带立于朝，可使与宾客言也，不知其仁也。”

(九)子谓子贡曰：“女与回也孰愈？”对曰：“赐也何敢望回？回也闻一以知十，赐也闻一以知二。”子曰：“弗如也；吾与女弗如

也。”

(十)宰予昼寝。子曰：“朽木不可雕也，粪土之墙不可圻也；于予与何诛？”子曰：“始吾于人也，听其言而信其行；今吾于人也，听其言而观其行。于予与改是。”

(十一)子曰：“吾未见刚者。”或对曰：“申枨。”子曰：“枨也欲，焉得刚？”

(十二)子贡曰：“我不欲人之加诸我也，吾亦欲无加诸人。”子曰：“赐也，非尔所及也。”

(十三)子贡曰：“夫子之文章，可得而闻也；夫子之言性与天道，不可得而闻也。”

(十四)子路有闻，未之能行，唯恐有闻。

(十五)子贡问曰：“孔文子何以谓之『文』也？”子曰：“敏而好学，不耻下问，是以谓之『文』也。”

(十六)子谓子产：“有君子之道四焉：其行己也恭，其事上也敬，其养民也惠，其使民也义。”

(十七)子曰：“晏平仲善与人交，久而敬之。”

(十八)子曰：“臧文仲居蔡，山节藻梲，何如其知也？”

(十九)子张问曰：“令尹子文三仕为令尹，无喜色；三已之，无愠色。旧令尹之政，必以告新令尹。何如？”子曰：“忠矣。”曰：“仁矣乎？”曰：“未知。焉得仁？”“崔子弑齐君，陈文子

有马十乘，弃而违。至于他邦，则曰：『犹吾大夫崔子也。』

违之。之一邦，则又曰：『犹吾大夫崔子也。』违之。何如？”

子曰：“清矣。”曰：“仁矣乎？”曰：“未知。焉得仁？”

(廿)季文子三思而后行。子闻之，曰：“再，斯可矣。”

(廿一)子曰：“宁武子，邦有道，则知；邦无道，则愚。其知可及也，其愚不可及也。”

(廿二)子在陈，曰：“归与！归与！吾党之小子狂简，斐然成章，不知所以裁之。”

(廿三)子曰：“伯夷、叔齐不念旧恶，怨是用希。”

(廿四)子曰：“孰谓微生高直？或乞醢焉，乞诸其邻而与之。”

(廿五)子曰：“巧言、令色、足恭，左丘明耻之，丘亦耻之。匿怨而友其人，左丘明耻之，丘亦耻之。”

(廿六)颜渊、季路侍。子曰：“盍各言尔志？”子路曰：“愿车马衣轻裘与朋友共，敝之而无憾。”颜渊曰：“愿无伐善，无施劳。”子路曰：“愿闻子之志。”子曰：“老者安之，朋友信之，少者怀之。”

(廿七)子曰：“已矣乎！吾未见能见其过而内自讼者也。”

(廿八)子曰：“十室之邑，必有忠信如丘者焉，不如丘之好学也。”

## ◎雍也篇第六

(一)子曰：“雍也可使南面。”

(二)仲弓问子桑伯子，子曰：“可也，简。”仲弓曰：“居敬而行简，以临其民，不亦可乎？居简而行简，无乃大简乎？”子曰：“雍之言然。”

(三)哀公问：“弟子孰为好学？”孔子对曰：“有颜回者好学，不迁怒，不贰过。不幸短命死矣。今也则亡，未闻好学者也。”

(四)子华使于齐，冉子为其母请粟。子曰：“与之釜。”请益。曰：“与之庾。”冉子与之粟五秉。子曰：“赤之适齐也，乘肥马，衣轻裘。吾闻之也：君子周急不继富。”

(五)原思为之宰，与之粟九百，辞。子曰：“毋！以与尔邻里乡党乎！”

(六)子谓仲弓曰：“犁牛之子且角，虽欲勿用，山川其舍诸？”

(七)子曰：“回也，其心三月不违仁，其余则日月至焉而已矣。”

(八)季康子问：“仲由可使从政也与？”子曰：“由也果，于从政乎何有？”曰：“赐也可使从政也与？”曰：“赐也达，于从政乎何有？”曰：“求也可使从政也与？”曰：“求也艺，于从政乎何有？”

(九)季氏使闵子骞为费宰。闵子骞曰：“善为我辞焉！如有复我者，则吾必在汶上矣。”

(十)伯牛有疾，子问之，自牖执其手，曰：“亡之，命矣夫！斯人也

而有斯疾也！斯人也而有斯疾也！”

(十一)子曰：“贤哉，回也！一簞食，一瓢饮，在陋巷，人不堪其忧，回也不改其乐。贤哉，回也！”

(十二)冉求曰：“非不说子之道，力不足也。”子曰：“力不足者，中道而废。今女画。”

(十三)子谓子夏曰：“女为君子儒！无为小人儒！”

(十四)子游为武城宰。子曰：“女得人焉耳乎？”曰：“有澹台灭明者，行不由径，非公事，未尝至于偃之室也。”

(十五)子曰：“孟之反不伐，奔而殿，将入门，策其马，曰：『非敢后也，马不进也。』”

(十六)子曰：“不有祝鮀之佞，而有宋朝之美，难乎免于今之世矣！”

(十七)子曰：“谁能出不由户？何莫由斯道也？”

(十八)子曰：“质胜文则野，文胜质则史。文质彬彬，然后君子。”

(十九)子曰：“人之生也直，罔之生也幸而免。”

(廿)子曰：“知之者不如好之者，好之者不如乐之者。”

(廿一)子曰：“中人以上，可以语上也；中人以下，不可以语上也。”

(廿二)樊迟问知。子曰：“务民之义，敬鬼神而远之，可谓知矣。”  
问仁。曰：“仁者先难而后获，可谓仁矣。”

(廿三)子曰：“知者乐水，仁者乐山。知者动，仁者静。知者乐，仁者寿。”

(廿四)子曰：“齐一变，至于鲁；鲁一变，至于道。”

(廿五)子曰：“觚不觚，觚哉！觚哉！”

(廿六)宰我问曰：“仁者，虽告之曰：『井有仁焉。』其从之也？”

子曰：“何为其然也？君子可逝也，不可陷也；可欺也，不可罔也。”

(廿七)子曰：“君子博学于文，约之以礼，亦可以弗畔矣夫！”

(廿八)子见南子，子路不说。夫子矢之曰：“予所否者，天厌之！天厌之！”

(廿九)子曰：“中庸之为德也，其至矣乎！民鲜久矣。”

(卅)子贡曰：“如有博施于民而能济众，何如？可谓仁乎？”子曰：

“何事于仁！必也圣乎？尧舜其犹病诸！夫仁者，己欲立而立人，己欲达而达人。能近取譬，可谓仁之方也已。”



## ◎述而篇第七

(一)子曰：“述而不作，信而好古，窃比于我老彭。”

(二)子曰：“默而识之，学而不厌，诲人不倦，何有于我哉？”

(三)子曰：“德之不修，学之不讲，闻义不能徙，不善不能改，是吾忧也。”

(四)子之燕居，申申如也，夭夭如也。

(五)子曰：“甚矣吾衰也！久矣吾不复梦见周公。”

(六)子曰：“志于道，据于德，依于仁，游于艺。”

(七)子曰：“自行束修以上，吾未尝无诲焉。”

(八)子曰：“不愤不启，不悱不发。举一隅不以三隅反，则不复也。”

(九)子食于有丧者之侧，未尝饱也。

(十)子于是日哭，则不歌。

(十一)子谓颜渊曰：“用之则行，舍之则藏，惟我与尔有是夫！”子路曰：“子行三军，则谁与？”子曰：“暴虎冯河，死而无悔者，吾不与也。必也临事而惧，好谋而成者也。”

(十二)子曰：“富而可求也，虽执鞭之士，吾亦为之。如不可求，从吾所好。”

(十三)子之所慎：齐、战、疾。

(十四)子在齐闻《韶》，三月不知肉味。曰：“不图为乐之至于斯也。”

(十五)冉有曰：“夫子为卫君乎？”子贡曰：“诺。吾将问之。”入，

曰：“伯夷、叔齐何人也？”曰：“古之贤人也。”曰：“怨乎？”曰：“求仁而得仁，又何怨？”出，曰：“夫子不为也。”

(十六)子曰：“饭疏食饮水，曲肱而枕之，乐亦在其中矣。不义而富且贵，于我如浮云。”

(十七)子曰：“加我数年，五十以学《易》，可以无大过矣。”

(十八)子所雅言，《诗》、《书》、执行，皆雅言也。

(十九)叶公问孔子于子路，子路不对。子曰：“女奚不曰：其为人也，发愤忘食，乐以忘忧，不知老之将至云尔。”

(廿)子曰：“我非生而知之者，好古，敏以求之者也。”

(廿一)子不语：怪、力、乱、神。

(廿二)子曰：“三人行，必有我师焉；择其善者而从之，其不善者而改之。”

(廿三)子曰：“天生德于予，恒其如予何？”

(廿四)子曰：“二三子以我为隐乎？吾无隐乎尔。吾无行而不与二三子者，是丘也。”

(廿五)子以四教：文、行、忠、信。

(廿六)子曰：“圣人，吾不得而见之矣；得见君子者，斯可矣。”子曰：“善人，吾不得而见之矣；得见有恒者，斯可矣。亡而为有，虚而为盈，约而为泰，难乎有恒矣。”

(廿七)子钓而不纲，弋不射宿。

(廿八)子曰：“盖有不知而作之者，我无是也。多闻，择其善者而从之，多见而识之，知之次也。”

(廿九)互乡难与言，童子见，门人惑。子曰：“与其进也，不与其退也，唯何甚？人洁己以进，与其洁也，不保其往也。”

(卅)子曰：“仁远乎哉？我欲仁，斯仁至矣。”

(卅一)陈司败问：“昭公知礼乎？”孔子曰：“知礼。”孔子退，揖巫马期而进之，曰：“吾闻君子不党，君子亦党乎？君取于吴，为同姓，谓之吴孟子。君而知礼，孰不知礼？”巫马期以告。子曰：“丘也幸，苟有过，人必知之。”

(卅二)子与人歌而善，必使反之，而后和之。

(卅三)子曰：“文，莫吾犹人也。躬行君子，则吾未之有得。”

(卅三)子曰：“若圣与仁，则吾岂敢？抑为之不厌，诲人不倦，则可谓云尔已矣。”公西华曰：“正唯弟子不能学也。”

(卅五)子疾病，子路请祷。子曰：“有诸？”子路对曰：“有之。誨曰：『祷尔于上下神祇。』”子曰：“丘之祷久矣。”

(卅六)子曰：“奢则不孙，俭则固。与其不孙也，宁固。”

(卅七)子曰：“君子坦荡荡，小人长戚戚。”

(卅八)子温而厉，威而不猛，恭而安。

## ◎泰伯篇第八

(一)子曰：“泰伯，其可谓至德也已矣。三以天下让，民无得而称焉。”

(二)子曰：“恭而无礼则劳，慎而无礼则蒞，勇而无礼则乱，直而无礼则绞。君子笃于亲，则民兴于仁；故旧不遗，则民不偷。”

(三)曾子有疾，召门弟子曰：“启予足！启予手！《诗》云：『战战兢兢，如临深渊，如履薄冰。』而今而后，吾知免夫！小子！”

(四)曾子有疾，孟敬子问之。曾子言曰：“鸟之将死，其鸣也哀；人之将死，其言也善。君子所贵乎道者三：动容貌，斯远暴慢矣；正颜色，斯近信矣；出辞气，斯远鄙倍矣。笱豆之事，则有司存。”

(五)曾子曰：“以能问于不能，以多问于寡；有若无，实若虚，犯而不校。昔者吾友尝从事于斯矣。”

(六)曾子曰：“可以托六尺之孤，可以寄百里之命，临大节而不可夺也。君子人与？君子人也。”

(七)曾子曰：“士不可以不弘毅，任重而道远。仁以为己任，不亦重乎？死而后已，不亦远乎？”

(八)子曰：“兴于诗，立于礼，成于乐。”

(九)子曰：“民可使由之，不可使知之。”

(十)子曰：“好勇疾贫，乱也。人而不仁，疾之已甚，乱也。”

(十一)子曰：“如有周公之才之美，使骄且吝，其余不足观也已。”

(十二)子曰：“三年学，不至于谷，不易得也。”

(十三)子曰：“笃信好学，守死善道。危邦不入，乱邦不居。天下有道则见，无道则隐。邦有道，贫且贱焉，耻也。邦无道，富且贵焉，耻也。”

(十四)子曰：“不在其位，不谋其政。”

(十五)子曰：“师挚之始，《关雎》之乱，洋洋乎盈耳哉！”

(十六)子曰：“狂而不直，侗而不愿，怍怍而信，吾不知之矣。”

(十七)子曰：“学如不及，犹恐失之。”

(十八)子曰：“巍巍乎，舜、禹之有天下也，而不与焉！”

(十九)子曰：“大哉尧之为君也！巍巍乎！唯天为大，唯尧则之。荡荡乎！民无能名焉。巍巍乎其有成功也！焕乎其有文章！”

(廿)舜有臣五人而天下治。武王曰：“予有乱臣十人。”孔子曰：“才难，不其然乎？唐、虞之际，于斯为盛。有妇人焉，九人而已。三分天下有其二，以服事殷。周之德，其可谓至德也已矣。”

(廿一)子曰：“禹，吾无间然矣。菲饮食而致孝乎鬼神，恶衣服而致美乎黻冕，卑宫室而尽力乎沟洫。禹，吾无间然矣。”

## ◎子罕篇第九

(一)子罕言利与命与仁。

(二)达巷党人曰：“大哉孔子！博学而无所成名。”子闻之，谓弟子曰：“吾何执？执御乎？执射乎？吾执御矣。”

(三)子曰：“麻冕，礼也；今也纯，俭，吾从众。拜下，礼也；今拜乎上，泰也。虽违众，吾从下。”

(四)子绝四：毋意，毋必，毋固，毋我。

(五)子畏于匡，曰：“文王既没，文不在兹乎？天之将丧斯文也，后死者不得与于斯文也；天之未丧斯文也，匡人其如予何？”

(六)宰问于子贡曰：“夫子圣者与？何其多能也？”子贡曰：“固天纵之将圣，又多能也。”子闻之，曰：“太宰知我乎！吾少也贱，故多能鄙事。君子多乎哉？不多也。”

(七)牢曰：“子云：『吾不试，故艺。』”

(八)子曰：“吾有知乎哉？无知也。有鄙夫问于我，空空如也。我叩其两端而竭焉。”

(九)子曰：“凤鸟不至，河不出图，吾已矣夫！”

(十)子见齐衰者、冕衣裳者与瞽者，见之，虽少，必作；过之，必趋。

(十一)颜渊喟然叹曰：“仰之弥高，钻之弥坚。瞻之在前，忽焉在后。夫子循循然善诱之，博我以文，约我以礼，欲罢不能。既竭吾才，如有所立卓尔。虽欲从之。末由也矣。”

(十二)子疾病，子路使门人为臣。病间。曰：“久矣哉，由之行诈也！无臣而为有臣。吾谁欺？欺天乎？且予与其死于臣之手也，无宁死于二三子之手乎？且予纵不得大葬，予死于道路乎？”

(十三)子贡曰：“有美玉于斯，韞椟而藏诸？求善贾而沽诸？”子曰：“沽之哉！沽之哉！我待贾者也。”

(十四)子欲居九夷。或曰：“陋，如之何？”子曰：“君子居之，何陋之有？”

(十五)子曰：“吾自卫反鲁，然后乐正，《雅》《颂》各得其所。”

(十六)子曰：“出则事公卿，入则事父兄，丧事不敢不勉，不为酒困，何有于我哉？”

(十七)子在川上曰：“逝者如斯夫！不舍昼夜。”

(十八)子曰：“吾未见好德如好色者也。”

(十九)子曰：“譬如为山，未成一簣，止，吾止也。譬如平地，虽覆一簣，进，吾往也。”

(廿)子曰：“语之而不惰者，其回也与！”

(廿一)子谓颜渊曰：“惜乎！吾见其进也，未见其止也。”

(廿二)子曰：“苗而不秀者有矣夫！秀而不实者有矣夫！”

(廿三)子曰：“后生可畏，焉知来者之不如今也？四十、五十而无闻焉，斯亦不足畏也已。”

(廿四)子曰：“法语之言，能无从乎？改之为贵。巽与之言，能无说

乎？绎之为贵。说而不绎，从而不改，吾未如之何也已矣。”

(廿五)子曰：“主忠信，毋友不如己者，过则勿惮改。”

(廿六)子曰：“三军可夺帅也，匹夫不可夺志也。”

(廿七)子曰：“衣敝缁袍，与衣狐貉者立，而不耻者，其由也与？『不  
伎不求，何用不臧？』”子路终身诵之。子曰：“是道也，何  
足以臧？”

(廿八)子曰：“岁寒，然后知松柏之后凋也。”

(廿九)子曰：“知者不惑，仁者不忧，勇者不惧。”

(卅)子曰：“可与共学，未可与适道；可与适道，未可与立；可与立，  
未可与权。”

(卅一)“唐棣之华，偏其反而。岂不尔思？室是远而。”子曰：“未  
之思也，夫何远之有？”



## ◎乡党篇第十

(一)孔子于乡党，恂恂如也，似不能言者。其在宗庙朝廷，便便言，唯谨尔。

(二)朝，与下大夫言，侃侃如也；与上大夫言，誾誾如也。君在，跂蹻如也，与与如也。”

(三)君召使摈，色勃如也，足躩如也。揖所与立，左右手，衣前后，襜如也。趋进，翼如也。宾退，必复命曰：“宾不顾矣。”

(四)入公门，鞠躬如也，如不容。立不中门，行不履闕。过位，色勃如也，足躩如也，其言似不足者。摄齐升堂，鞠躬如也，屏气似不息者。出，降一等，逞颜色，怡怡如也。没阶，趋进，翼如也。复其位，跂蹻如也。

(五)执圭，鞠躬如也，如不胜。上如揖，下如授。勃如战色，足蹶蹶如有循。享礼，有容色。私覿，愉愉如也。

(六)君子不以绀緇饰。红紫不以为褻服。当暑，袗絺綌，必表而出之。缁衣，羔裘；素衣，麕裘；黄衣，狐裘。褻裘长，短右袂。必有寝衣，长一身有半。狐貉之厚以居。去丧，无所不佩。非帷裳，必杀之。羔裘玄冠不以吊。吉月，必朝服而朝。

(七)齐，必有明衣，布。齐必变食，居必迁坐。

(八)食不厌精，脍不厌细。食饴而謁，鱼馁而肉败，不食。色恶，不食。臭恶，不食。失饪，不食。不时，不食。割不正，不食。不

得其酱，不食。肉虽多，不使胜食气。惟酒无量，不及乱。沽酒市脯不食。不撤姜食，不多食。

(九)祭于公，不宿肉。祭肉不出三日。出三日，不食之矣。

(十)食不语，寝不言。

(十一)虽疏食菜羹，必祭，必齐如也。

(十二)席不正，不坐。

(十三)乡人饮酒，杖者出，斯出矣。

(十四)乡人傺，朝服而立于阼阶。

(十五)问人于他邦，再拜而送之。

(十六)康子馈药，拜而受之。曰：“丘未达，不敢尝。”

(十七)厩焚。子退朝，曰：“伤人乎？”不问马。

(十八)君赐食，必正席先尝之。君赐腥，必熟而荐之。君赐生，必畜之。侍食于君，君祭，先饭。疾，君视之，东首，加朝服，拖绅。

(十九)君命召，不俟驾行矣。

(廿)入太庙，每事问。

(廿一)朋友死，无所归，曰：“于我殡。”

(廿二)朋友之馈，虽车马，非祭肉，不拜。

(廿三)寝不尸，居不客。

(廿四)见齐衰者，虽狎，必变。见冕者与瞽者，虽褻，必以貌。凶服

者式之，式负版者。有盛饌，必变色而作。迅雷风烈，必变。

(廿五)升车，必正立，执绥。车中，不内顾，不疾言，不亲指。

(廿六)色斯举矣，翔而后集。曰：“山梁雌雉，时哉时哉！”子路共之，三嗅而作。

## ◎先进篇第十一

(一)子曰：“先进于礼乐，野人也；后进于礼乐，君子也。如用之，则吾从先进。”

(二)子曰：“从我于陈、蔡者，皆不及门也。”

(三)德行：颜渊、闵子骞、冉伯牛、仲弓。言语：宰我、子贡。政事：冉有、季路。文学：子游、子夏。

(四)子曰：“回也非助我者也，于吾言无所不说。”

(五)子曰：“孝哉，闵子骞！人不间于其父母昆弟之言。”

(六)南容三复“白圭”，孔子以其兄之子妻之。

(七)季康子问：“弟子孰为好学？”孔子对曰：“有颜回者好学，不幸短命死矣！今也则亡。”

(八)渊死，颜路请子之车以为之椁。子曰：“才不才，亦各言其子也。鲤也死，有棺而无椁。吾不徒行以为之椁。以吾从大夫之后，不可徒行也。”

(九)颜渊死。子曰：“噫！天丧予！天丧予！”

(十)颜渊死，子哭之恸。从者曰：“子恸矣！”曰：“有恸乎？非夫人之为恸而谁为？”

(十一)颜渊死，门人欲厚葬之。子曰：“不可。”门人厚葬之。子曰：“回也视予犹父也，予不得视犹子也。非我也，夫二三子也。”

(十二)季路问事鬼神。子曰：“未能事人，焉能事鬼？”曰：“敢问

死。”曰：“未知生，焉知死？”

(十三) 闵子侍侧，闾闾如也；子路，行行如也；冉有、子贡，侃侃如也。子乐。“若由也，不得其死然。”

(十四) 鲁人为长府。闵子骞曰：“仍旧贯，如之何？何必改作？”子曰：“夫人不言，言必有中。”

(十五) 子曰：“由之瑟奚为于丘之门？”门人不敬子路。子曰：“由也升堂矣，未入于室也。”

(十六) 子贡问：“师与商也孰贤？”子曰：“师也过，商也不及。”曰：“然则师愈与？”子曰：“过犹不及。”

(十七) 季氏富于周公，而求也为之聚敛而附益之。子曰：“非吾徒也。小子鸣鼓而攻之可也。”

(十八) 柴也愚，参也鲁，师也辟，由也喭。

(十九) 子曰：“回也其庶乎？屡空。赐不受命，而货殖焉，亿则屡中。”

(廿) 子张问善人之道。子曰：“不践迹，亦不入于室。”

(廿一) 子曰：“论笃是与，君子者乎？色庄者乎？”

(廿二) 子路问：“闻斯行诸？”子曰：“有父兄在，如之何其闻斯行之？”冉有问：“闻斯行诸？”子曰：“闻斯行之。”公西华曰：“由也问『闻斯行诸』，子曰：『有父兄在』，求也问『闻斯行诸』，子曰：『闻斯行之』。赤也惑，敢问。”子曰：“求也退，故进之；由也兼人，故退之。”

(廿三)子畏于匡，颜渊后。子曰：“吾以女为死矣。”曰：“子在，回何敢死？”

(廿四)季子然问：“仲由、冉求可谓大臣与？”子曰：“吾以子为异之问，曾由与求之问。所谓大臣者，以道事君，不可则止。今由与求也，可谓具臣矣。”曰：“然则从之者与？”子曰：“弑父与君，亦不从也。”

(廿五)子路使子羔为费宰。子曰：“贼夫人之子。”子路曰：“有民人焉，有社稷焉，何必读书，然后为学？”子曰：“是故恶夫佞者。”

(廿六)子路、曾皙、冉有、公西华侍坐。子曰：“以吾一日长乎尔，毋吾以也。居则曰：『不吾知也！』如或知尔，则何以哉？”子路率尔而对曰：“千乘之国，摄乎大国之间，加之以师旅，因之以饥馑；由也为之，比及三年，可使有勇，且知方也。”夫子哂之。“求！尔何如？”对曰：“方六七十，如五六十，求也为之，比及三年，可使足民。如其礼乐，以俟君子。”“赤！尔何如？”对曰：“非曰能之，愿学焉。宗庙之事，如会同，端章甫，愿为小相焉。”“点！尔何如？”鼓瑟希，铿尔，舍瑟而作，对曰：“异乎三子者之撰。”子曰：“何伤乎？亦各言其志也。”曰：“莫春者，春服既成，冠者五六人，童子六七人，浴乎沂，风乎舞雩，咏而归。”夫子喟然叹曰：“吾与

点也！”三子者出，曾皙后。曾皙曰：“夫三子者之言何如？”  
子曰：“亦各言其志也已矣。”曰：“夫子何哂由也？”曰：  
“为国以礼，其言不让，是故哂之。”“唯求则非邦也与？”  
“安见方六七十如五六十而非邦也者？”“唯赤则非邦也与？”  
“宗庙会同，非诸侯而何？赤也为之小，孰能为之大？”

## ◎颜渊篇第十二

(一)颜渊问仁。子曰：“克己复礼为仁。一日克己复礼，天下归仁焉。

为仁由己，而由人乎哉？”颜渊曰：“请问其目。”子曰：“非礼勿视，非礼勿听，非礼勿言，非礼勿动。”颜渊曰：“回虽不敏，请事斯语矣。”

(二)仲弓问仁。子曰：“出门如见大宾，使民如承大祭。己所不欲，

勿施于人。在邦无怨，在家无怨。”仲弓曰：“雍虽不敏，请事斯语矣。”

(三)司马牛问仁。子曰：“仁者，其言也讷。”曰：“其言也讷，斯

谓之仁已乎？”子曰：“为之难，言之得无讷乎？”

(四)司马牛问君子。子问：“君子不忧不惧。”曰：“不忧不惧，斯

谓之君子已乎？”子曰：“内省不疚，夫何忧何惧？”

(五)司马牛忧曰：“人皆有兄弟，我独亡。”子夏曰：“商闻之矣：

死生有命，富贵在天。君子敬而无失，与人恭而有礼，四海之内皆兄弟也。君子何患乎无兄弟也？”

(六)子张问明。子曰：“浸润之谮，肤受之愬，不行焉，可谓明也已

矣。浸润之谮，肤受之愬，不行焉，可谓远也已矣。”

(七)子贡问政。子曰：“足食，足兵，民信之矣。”子贡曰：“必不

得已而去，于斯三者何先？”曰：“去兵。”子贡曰：“必不得已而去，于斯二者何先？”曰：“去食。自古皆有死，民无信不



立。”

(八)棘子成曰：“君子质而已矣，何以文为？”子贡曰：“惜乎，夫子之说君子也！驷不及舌。文犹质也，质犹文也。虎豹之鞞犹犬羊之鞞。”

(九)哀公问于有若曰：“年饥，用不足，如之何？”有若对曰：“盍彻乎？”曰：“二，吾犹不足，如之何其彻也？”对曰：“百姓足，君孰与不足？百姓不足，君孰与足？”

(十)子张问崇德辨惑。子曰：“主忠信，徙义，崇德也。爱之欲其生，恶之欲其死。既欲其生，又欲其死，是惑也。『诚不以富，亦祇以异』。”

(十一)齐景公问政于孔子。孔子对曰：“君君，臣臣，父父，子子。”公曰：“善哉！信如君不君，臣不臣，父不父，子不子，虽有粟，吾得而食诸？”

(十二)子曰：“片言可以折狱者，其由也与？”子路无宿诺。

(十三)子曰：“听讼，吾犹人也。必也使无讼乎？”

(十四)子张问政。子曰：“居之无倦，行之以忠。”

(十五)子曰：“博学于文，约之以礼，亦可以弗畔矣夫！”

(十六)子曰：“君子成人之美，不成人之恶。小人反是。”

(十七)季康子问政于孔子。孔子对曰：“政者，正也。子帅以正，孰敢不正？”

(十八)季康子患盜，問于孔子。孔子對曰：“苟子之不欲，雖賞之不竊。”

(十九)季康子問政于孔子曰：“如殺無道，以就有道，何如？”孔子對曰：“子為政，焉用殺？子欲善而民善矣。君子之德風，小人之德草。草上之風必偃。”

(廿)子張問：“士何如斯可謂之達矣？”子曰：“何哉，爾所謂達者？”子張對曰：“在邦必聞，在家必聞。”子曰：“是聞也，非達也。夫達也者，質直而好義，察言而觀色，慮以下人。在邦必達，在家必達。夫聞也者，色取仁而行違，居之不疑。在邦必聞，在家必聞。”

(廿一)樊遲從游于舞雩之下，曰：“敢問崇德，修慝，辨惑。”子曰：“善哉問！先事後得，非崇德與？攻其惡，無攻人之惡，非修慝與？一朝之忿，忘其身，以及其親，非惑與？”

(廿二)樊遲問仁。子曰：“愛人。”問知。子曰：“知人。樊遲未達。子曰：”舉直錯諸枉，能使枉者直。”樊遲退，見子夏曰：“鄉也吾見于夫子而問知，子曰：『舉直錯諸枉，能使枉者直』，何謂也？”子夏曰：“富哉言乎！舜有天下，選于眾，舉皋陶，不仁者遠矣。湯有天下，選于眾，舉伊尹，不仁者遠矣。”

(廿三)子貢問友。子曰：“忠告而善道之，不可則止，毋自辱焉。”

(廿四)曾子曰：“君子以文會友，以友輔仁。”

## ◎子路篇第十三

(一)子路问政。子曰：“先之劳之。”请益。曰：“无倦。”

(二)仲弓为季氏宰，问政。子曰：“先有司，赦小过，举贤才。”曰：

“焉知贤才而举之？”子曰：“举尔所知；尔所不知，人其舍诸？”

(三)子路曰：“卫君待子而为政，子将奚先？”子曰：“必也正名乎？”

子路曰：“有是哉，子之迂也！奚其正？”子曰：“野哉，由也！君子于其所不知，盖阙如也。名不正，则言不顺；言不顺，则事不成；事不成，则礼乐不兴；礼乐不兴，则刑罚不中；刑罚不中，则民无所措手足。故君子名之必可言也，言之必可行也。君子于其言，无所苟而已矣。”

(四)樊迟请学稼。子曰：“吾不如老农。”请学为圃。曰：“吾不如老圃。”樊迟出，子曰：“小人哉，樊须也！上好礼，则民莫敢不敬；上好义，则民莫敢不服；上好信，则民莫敢不用情。夫如是，则四方之民襁负其子而至矣，焉用稼？”

(五)子曰：“诵诗三百，授之以政，不达；使于四方，不能专对；虽多，亦奚以为？”

(六)子曰：“其身正，不令而行；其身不正，虽令不从。”

(七)子曰：“鲁卫之政，兄弟也。”

(八)子谓卫公子荆：“善居室。始有，曰：『苟合矣。』』少有，曰：『苟完矣。』』富有，曰：『苟美矣。』”

(九)子适卫，冉有仆。子曰：“庶矣哉！冉有曰：“既庶矣，又何加焉？”曰：“富之。”曰：“既富矣，又何加焉？”曰：“教之。”

(十)子曰：“苟有用我者，期月而已可也，三年有成。”

(十一)子曰：“『善人为邦百年，亦可以胜残去杀矣。』诚哉是言也！”

(十二)子曰：“如有王者，必世而后仁。”

(十三)子曰：“苟正其身矣，于从政乎何有？不能正其身，如正人何？”

(十四)冉子退朝。子曰：“何晏也？”对曰：“有政。”子曰：“其事也。如有政，虽不吾以，吾其与闻之。”

(十五)定公问：“一言而可以兴邦，有诸？”孔子对曰：“言不可以若是其几也。人之言曰：『为君难，为臣不易。』如知为君之难也，不几乎一言而兴邦乎？”曰：“一言而丧邦，有诸？”孔子对曰：“言不可以若是其几也。人之言曰：『予无乐乎为君，唯其言而莫予违也。』如其善而莫之违也，不亦善乎？如不善而莫之违也，不几乎一言而丧邦乎？”

(十六)叶公问政。子曰：“近者说，远者来。”

(十七)子夏为莒父宰。问政。子曰：“无欲速，无见小利。欲速，则不达；见小利，则大事不成。”

(十八)叶公语孔子曰：“吾党有直躬者，其父攘羊，而子证之。”孔子曰：“吾党之直者异于是：父为子隐，子为父隐。一直在其中矣。”

(十九)樊迟问仁。子曰：“居处恭，执事敬，与人忠。虽之夷狄，不可弃也。”

(廿)子贡问曰：“何如斯可谓之士矣？”子曰：“行己有耻，使于四方，不辱君命，可谓士矣。”曰：“敢问其次。”曰：“宗族称孝焉，乡党称弟焉。”曰：“敢问其次。”曰：“言必信，行必果，硜硜然小人哉！抑亦可以为次矣。”曰：“今之从政者何如？”子曰：“噫！斗筲之人，何足算也？”

(廿一)子曰：“不得中行而与之，必也狂狷乎？狂者进取，狷者有所不为也。”

(廿二)子曰：“南人有言曰：『人而无恒，不可以作巫医。』善夫。”  
“不恒其德，或承之羞。”子曰：“不占而已矣。”

(廿三)子曰：“君子和而不同，小人同而不和。”

(廿四)子贡问曰：“乡人皆好之，何如？”子曰：“未可也。”“乡人皆恶之，何如？”子曰：“未可也。不如乡人之善者好之，其不善者恶之。”

(廿五)子曰：“君子易事而难说也。说之不以道，不说也；及其使人也，器之。小人难事而易说也。说之虽不以道，说也；及其使人也，求备焉。”

(廿六)子曰：“君子泰而不骄，小人骄而不泰。”

(廿七)子曰：“刚、毅、木、讷近仁。”

(廿八)子路问曰：“何如斯可谓之士矣？”子曰：“切切偲偲，怡怡如也，可谓士矣。朋友切切偲偲，兄弟怡怡。”

(廿九)子曰：“善人教民七年，亦可以即戎矣。”

(卅)子曰：“以不教民战，是谓弃之。”

## ◎宪问篇第十四

(一)宪问耻。子曰：“邦有道，谷；邦无道，谷，耻也。”“克、伐、怨、欲不行焉，可以为仁矣？”子曰：“可以为难矣，仁则吾不知也。”

(二)子曰：“士而怀居，不足以为士矣。”

(三)子曰：“邦有道，危言危行；邦无道，危行言孙。”

(四)子曰：“有德者必有言，有言者不必有德。仁者必有勇，勇者不必有仁。”

(五)南宫适问于孔子曰：“羿善射，奭荡舟，俱不得其死然。禹、稷躬稼而有天下。”夫子不答。南宫适出，子曰：“君子哉若人！尚德哉若人！”

(六)子曰：“君子而不仁者有矣夫，未有小人而仁者也。”

(七)子曰：“爱之，能勿劳乎？忠焉，能勿诲乎？”

(八)子曰：“为命，裨谌草创之，世叔讨论之，行人子羽修饰之，东里子产润色之。”

(九)或问子产。子曰：“惠人也。”问子西。曰：“彼哉！彼哉！”

问管仲。曰：“人也。夺伯氏骈邑三百，饭疏食，没齿无怨言。”

(十)子曰：“贫而无怨难，富而无骄易。”

(十一)子曰：“孟公绰为赵、魏老则优，不可以为滕、薛大夫。”

(十二)子路问成人。子曰：“若臧武仲之知，公绰之不欲，卞庄子之

勇，冉求之艺，文之以礼乐，亦可以为成人矣。”曰：“今之成人者何必然？见利思义，见危授命，久要不忘平生之言，亦可以为成人矣。”

(十三) 子问公叔文子于公明贾曰：“信乎，夫子不言，不笑，不取乎？”

公明贾对曰：“以告者过也，夫子时然后言，人不厌其言；乐然后笑，人不厌其笑；义然后取，人不厌其取。”子曰：“其然？岂其然乎？”

(十四) 子曰：“臧武仲以防求为后于鲁，虽曰不要君，吾不信也。”

(十五) 子曰：“晋文公谲而不正，齐桓公正而不谲。”

(十六) 子路曰：“桓公杀公子纠，召忽死之，管仲不死。”曰：“未仁乎？”子曰：“桓公九合诸侯，不以兵车，管仲之力也。如其仁，如其仁。”

(十七) 子贡曰：“管仲非仁者与？桓公杀公子纠，不能死，又相之。”

子曰：“管仲相桓公，霸诸侯，一匡天下，民到于今受其赐。微管仲，吾其被发左衽矣。岂若匹夫匹妇之为谅也，自经于沟渎而莫之知也？”

(十八) 公叔文子之臣大夫 与文子同升诸公。子闻之曰：“可以为『文』矣。”

(十九) 子言卫灵公之无道也，康子曰：“夫如是，奚而不丧？”孔子曰：“仲叔圉治宾客，祝鮀治宗庙，王孙贾治军旅。夫如是，



奚其喪？”

(廿)子曰：“其言之不怍，則為之也難。”

(廿一)陣成子弑簡公。孔子沐浴而朝，告于哀公曰：“陣恒弑其君，請討之。”公曰：“告夫三子！”孔子曰：“以吾從大夫之後，不敢不告也。君曰『告夫三子』者！”之三子告，不可。孔子曰：“以吾從大夫之後，不敢不告也。”

(廿二)子路問事君。子曰：“勿欺也，而犯之。”

(廿三)子曰：“君子上達，小人下達。”

(廿四)子曰：“古之學者為己，今之學者為人。”

(廿五)蘧伯玉使人于孔子。孔子與之坐而問焉，曰：“夫子何為？”對曰：“夫子欲寡其過而未能也。”使者出。子曰：“使乎！使乎！”

(廿六)子曰：“不在其位，不謀其政。”曾子曰：“君子思不出其位。”

(廿七)子曰：“君子耻其言之過其行。”

(廿八)子曰：“君子道者三，我無能焉：仁者不忧，知者不惑，勇者不惧。”子貢曰：“夫子自道也。”

(廿九)子貢方人。子曰：“賜也，賢乎哉？夫我則不暇。”

(卅)子曰：“不患人之不己知，患其不能也。”

(卅一)子曰：“不逆詐，不億不信，抑亦先覺者，是賢乎！”

(卅二)微生亩謂孔子曰：“丘何為是栖栖者與？無乃為佞乎？”孔子

曰：“非敢为佞也，疾固也。”

(卅三)子曰：“骥不称其力，称其德也。”

(卅四)或曰：“以德报怨，何如？”子曰：“何以报德？以直报怨，以德报德。”

(卅五)子曰：“莫我知也夫！”子贡曰：“何为其莫知子也？”子曰：“不怨天，不尤人；下学而上达。知我者其天乎！”

(卅六)公伯寮愬子路于季孙。子服景伯以告，曰：“夫子固有惑志于公伯寮，吾力犹能肆诸市朝。”子曰：“道之将行也与，命也。道之将废也与，命也。公伯寮其如命何！”

(卅七)子曰：“贤者辟世，其次辟地，其次辟色，其次辟言。”子曰：“作者七人矣。”

(卅八)子路宿于石门。晨门曰：“奚自？”子路曰：“自孔氏。”曰：“是知其不可而为之者与？”

(卅九)子击磬于卫，有荷蕢而过孔氏之门者，曰：“有心哉，击磬乎！”既而曰：“鄙哉！硜硜乎！莫己知也，斯己而已矣，深则厉，浅则揭。”子曰：“果哉！未之难矣。”

(四十)子张曰：“《书》云：『高宗谅阴，三年不言。』何谓也？”子曰：“何必高宗，古之人皆然。君薨，百官总己以听于冢宰三年。”

(四一)子曰：“上好礼，则民易使也。”

(四二)子路问君子。子曰：“作己以敬。”曰：“如斯而已乎？”曰：“修己以安人。”曰：“如斯而已乎？”曰：“修己以安百姓。修己以安百姓，尧舜其犹病诸？”

(四三)原壤夷俟。子曰：“幼而不孙弟，长而无述焉，老而不死，是为贼。”以杖叩其胫。

(四四)阙党童子将命，或问之曰：“益者与？”子曰：“吾见其居于位也，见其与先生并行也。非求益者也，欲速成者也。”

## ◎卫灵公篇第十五

(一)卫灵公问阵于孔子。孔子对曰：“俎豆之事，则尝闻之矣；军旅之事，未之学也。”明日遂行。

(二)在阵绝粮，从者病，莫能兴。子路愠见曰：“君子亦有穷乎？”子曰：“君子固穷，小人穷斯滥矣。”

(三)子曰：“赐也，女以予为多学而识之者与？”对曰：“然。非与？”曰：“非也，予一以贯之。”

(四)子曰：“由！知德者鲜矣。”

(五)子曰：“无为而治者其舜也与？夫何为哉？恭己正南面而已矣。”

(六)子张问行。子曰：“言忠信，行笃敬，虽蛮貊之邦，行矣。言不忠信，行不笃敬，虽州里，行乎哉？立则见其参于前也，在舆则见其倚于衡也，夫然后行。”子张书诸绅。

(七)子曰：“直哉史鱼！邦有道，如矢；邦无道，如矢。君子哉蘧伯玉！邦有道，则仕；邦无道，则可卷而怀之。”

(八)子曰：“可与言而不与之言，失人；不可与言而与之言，失言。知者不失人，亦不失言。”

(九)子曰：“志士仁人，无求生以害仁，有杀身以成仁。”

(十)子贡问为仁，子曰：“工欲善其事，必先利其器。居是邦也，事其大夫之贤者，友其士之仁者。”

(十一)颜渊问为邦。子曰：“行夏之时，乘殷之辂，服周之冕，乐则

《韶》、《舞》、放郑声，远佞人。郑声淫，佞人殆。”

(十二)子曰：“人无远虑，必有近忧。”

(十三)子曰：“已矣乎！吾未见好德如好色者也。”

(十四)子曰：“臧文仲其窃位者与！知柳下惠之贤而不与立也。”

(十五)子曰：“躬自厚而薄责于人，则远怨矣。”

(十六)子曰：“不曰『如之何，如之何』者，吾未如之何也已矣。”

(十七)子曰：“群居终日，言不及义，好行小慧，难矣哉！”

(十八)子曰：“君子义以为质，礼以行之，孙以出之，信以成之。君子哉！”

(十九)子曰：“君子病无能焉，不病人之不己知也。”

(廿)子曰：“君子疾没世而名不称焉。”

(廿一)子曰：“君子求诸己，小人求诸人。”

(廿二)子曰：“君子矜而不争，群而不党。”

(廿三)子曰：“君子不以言举人，不以人废言。”

(廿四)子贡问曰：“有一言而可以终身行之者乎？”子曰：“其『恕』乎！己所不欲，勿施于人。”

(廿五)子曰：“吾之于人也，谁毁谁誉？如有所誉者，其有所试矣。斯民也，三代之所以直道而行也。”

(廿六)子曰：“吾犹及史之阙文也。有马者借人乘之，今亡矣夫！”

(廿七)子曰：“巧言乱德。小不忍，则乱大谋。”

(廿八)子曰：“众恶之，必察焉；众好之，必察焉。”

(廿九)子曰：“人能弘道，非道弘人。”

(卅)子曰：“过而不改，是谓过矣。”

(卅一)子曰：“吾尝终日不食，终夜不寝，以思，无益，不如学也。”

(卅二)子曰：“君子谋道不谋食。耕也，馁在其中矣；学也，禄在其中矣。君子忧道不忧贫。”

(卅三)子曰：“知及之，仁不能守之，虽得之，必失之。知及之，仁能守之，不庄以莅之，动之不以礼，未善也。”

(卅四)子曰：“君子不可小知而可大受也，小人不可大受而可小知也。”

(卅五)子曰：“民之于仁也，甚于水火。水火，吾见蹈而死者矣，未见蹈仁而死者也。”

(卅六)子曰：“当仁，不让于师。”

(卅七)子曰：“君子贞而不谅。”

(卅八)子曰：“事君，敬其事而后其食。”

(卅九)子曰：“有教无类。”

(四十)子曰：“道不同不相为谋。”

(四一)子曰：“辞达而已矣。”

(四二)师冕见，及阶，子曰：“阶也。”及席，子曰：“席也。”皆坐，子告之曰：“某在斯，某在斯。”师冕出。子张问曰：“与师言之道与？”子曰：“然。固相师之道也。”

## ◎季氏篇第十六

(一)季氏将伐颛臾。冉有、季路见于孔子曰：“季氏将有事于颛臾。”

孔子曰：“求！无乃尔是过与？夫颛臾，昔者先王以为东蒙主，且在邦域之中矣，是社稷之臣也。何以伐为？”

冉有曰：“夫子欲之，吾二臣者皆不欲也。”

孔子曰：“求！周任有言曰：『阵力就列，不能者止。』危而不持，颠而不扶，则将焉用彼相矣？且尔言过矣。虎兕出于柙，龟玉毁于椟中，是谁之过与？”

冉有曰：“今夫颛臾，固而近于费。今不取，后世必为子孙忧。”

孔子曰：“求！君子疾夫舍曰『欲之』而必为之辞。丘也闻有国有家者，不患寡而患不均，不患贫而患不安。盖均无贫，和无寡，安无倾。夫如是，故远人不服，则修文德以来之。既来之，则安之。今由与求也，相夫子，远人不服而不能来也，邦分崩离析而不能守也，而谋动干戈于邦内。吾恐季孙之忧，不在颛臾，而在萧墙之内也。”

(二)孔子曰：“天下有道，则礼乐征伐自天子出；天下无道，则礼乐征伐自诸侯出。自诸侯出，盖十世希不失矣；自大夫出，五世希不失矣；陪臣执国命，三世希不失矣。天下有道，则政不在大夫。天下有道，则庶人不议。”

(三)孔子曰：“禄之去公室五世矣，政逮于大夫四世矣，故夫三桓之子孙微矣。”

(四)孔子曰：“益者三友，损者三友。友直，友谅，友多闻，益矣。友便辟，友善柔，友便佞，损矣。”

(五)孔子曰：“益者三乐，损者三乐。乐节礼乐，乐道人之善，乐多贤友，益矣。乐骄乐，乐佚游，乐宴乐，损矣。”

(六)孔子曰：“侍于君子有三：言未及之而言，谓之躁；言及之而不言，谓之隐；未见颜色而言，谓之瞽。”

(七)孔子曰：“君子有三戒：少之时，血气未定，戒之在色；及其壮也，血气方刚，戒之在斗；及其老也，血气既衰，戒之在得。”

(八)孔子曰：“君子有三畏：畏天命，畏大人，畏圣人之言。小人不知天命而不畏也，狎大人，侮圣人之言。”

(九)孔子曰：“生而知之者上也，学而知之者次也；困而学之，又其次也；困而不学，民斯为下矣。”

(十)孔子曰：“君子有九思：视思明，听思聪，色思温，貌思恭，言思忠，事思敬，疑思问，忿思难，见得思义。”

(十一)孔子曰：“见善如不及，见不善如探汤。吾见其人矣，吾闻其语矣。隐居以求其志，行义以达其道。吾闻其语矣，未见其人也。”

(十二)齐景公有马千驷，死之日，民无德而称焉。伯夷、叔齐饿于首



阳之下，民到于今称之。其斯之谓与？

(十三)陈亢问于伯鱼曰：“子亦有异闻乎？”对曰：“未也。尝独立，鲤趋而过庭。曰：『学《诗》乎？』对曰：『未也。不学《诗》，无以言。』鲤退而学《诗》。他日，又独立，鲤趋而过庭。曰：『学礼乎？』对曰：『未也。不学礼，无以立。』鲤退而学礼。闻斯二者。”陈亢退而喜曰：“问一得三：闻《诗》，闻礼，又闻君子之远其子也。”

(十四)邦君之妻，君称之曰“夫人”，夫人自称曰“小童”；邦人称之曰“君夫人”，称诸异邦曰“寡小君”；异邦人称之，亦曰“君夫人”。

## ◎阳货篇第十七

(一)阳货欲见孔子，孔子不见，归孔子豚。孔子时其亡也，而往拜之。

遇诸涂。谓孔子曰：“来！予与尔言。”曰：“怀其宝而迷其邦，

可谓仁乎？”曰：“不可。”“好从事而亟失时，可谓知乎？”

曰：“不可。”“日月逝矣，岁不我与。”孔子曰：“诺。吾将仕矣。”

(二)子曰：“性相近也，习相远也。”

(三)子曰：“唯上知与下愚不移。”

(四)子之武城，闻弦歌之声。夫子莞尔而笑，曰：“割鸡焉用牛刀？”

子游对曰：“昔者偃也闻诸夫子曰：『君子学道则爱人，小人学道则易使也。』”子曰：“二三子！偃之言是也。前言戏之耳。”

(五)公山弗扰以费畔，召，子欲往。子路不说，曰：“末之也，已，

何必公山氏之之也？”子曰：“夫召我者，而岂徒哉？如有用我者，吾其为东周乎？”

(六)子张问仁于孔子。孔子曰：“能行五者于天下，为仁矣。”“请

问之。”曰：“恭宽信敏惠。恭则不侮，宽则得众，信则人任焉，敏则有功，惠则足以使人。”

(七)佛肸召，子欲往。子路曰：“昔者由也闻诸夫子曰：『亲于其身

为不善者，君子不入也。』佛肸以中牟畔，子之往也，如之何？”

子曰：“然。有是言也。不曰坚乎，磨而不磷；不曰白乎，涅而

不緇。吾豈匏瓜也哉？焉能系而不食？”

(八)子曰：“由也！女闻六言六蔽矣乎？”对曰：“未也。”“居！吾语女。好仁不好学，其蔽也愚；好知不好学，其蔽也荡；好信不好学，其蔽也贼；好直不好学，其蔽也绞；好勇不好学，其蔽也乱；好刚不好学，其蔽也狂。”

(九)子曰：“小子何莫学夫《诗》？诗，可以兴，可以观，可以群，可以怨。迩之事父，远之事君；多识于鸟兽草木之名。”

(十)子谓伯鱼曰：“女为《周南》、《召南》矣乎？人而不为《周南》、《召南》，其犹正墙面而立也与？”

(十一)子曰：“礼云礼云，玉帛云乎哉？乐云乐云，钟鼓云乎哉？”

(十二)子曰：“色厉而内荏，譬诸小人，其犹穿窬之盗也与？”

(十三)子曰：“乡原，德之贼也。”

(十四)子曰：“道听而涂说，德之弃也。”

(十五)子曰：“鄙夫可与事君也与哉？”其未得之也，患得之，既得之，患失之，苟患失之，无所不至矣。”

(十六)子曰：“古者民有三疾，今也或是之亡也。古之狂也肆，今之狂也荡；古之矜也廉，今之矜也忿戾；古之愚也直，今之愚也诈而已矣。”

(十七)子曰：“巧言令色，鲜矣仁。”

(十八)子曰：“恶紫之夺朱也，恶郑声之乱雅乐也，恶利口之覆邦家

者。”

(十九)子曰：“予欲无言。”子贡曰：“子如不言，则小子何述焉？”

子曰：“天何言哉？四时行焉，百物生焉。天何言哉？”

(廿)孺悲欲见孔子，孔子辞以疾。将命者出户，取瑟而歌，使之闻之。

(廿一)宰我问：“三年之丧，期已久矣。君子三年不为礼，礼必坏；

三年不为乐，乐必崩。旧谷既没，新谷既升，钻燧改火，期可

已矣。”子曰：“食夫稻，衣夫锦，于女安乎？”曰：“安。”

“女安，则为之。夫君子之居丧，食旨不甘，闻乐不乐，居处不安，故不为也。今女安，则为之！”宰我出。子曰：“予之不仁也！

子生三年，然后免于父母之怀。夫三年之丧，天下之通丧也。予也有三年之爱于其父母乎？”

(廿二)子曰：“饱食终日，无所用心，难矣哉！不有博弈者乎？为之，犹贤乎已。”

(廿三)子路曰：“君子尚勇乎！”子曰：“君子义以为上。君子有勇而无义为乱，小人有勇而无义为盗。”

(廿四)子贡曰：“君子亦有恶乎！”子曰：“有恶：恶称人之恶者，恶居下流而上者，恶勇而不礼者，恶果敢而窒者。”曰：“赐也亦有恶乎？”“恶徼以为知者，恶不孙以为勇者，恶讦以为直者。”

(廿五)子曰：“唯女子与小人为难养也，近之则不孙，远之则怨。”

(廿六)子曰：“年四十而见恶焉，其终也已。”

## ◎微子篇第十八

- (一)微子去之，箕子为之奴，比干谏而死。孔子曰：“殷有三仁。”
- (二)柳下惠为士师，三黜。人曰：“子未可以去乎？”曰：“直道而事人，焉往而不三黜？枉道而事人，何必去父母之邦？”
- (三)齐景公待孔子曰：“若季氏，则吾不能；以季、孟之间待之。”曰：“吾老矣，不能用也。”孔子行。
- (四)齐人归女乐，季桓子受之，三日不朝，孔子行。
- (五)楚狂接舆歌而过孔子曰：“凤兮凤兮！何德之衰？往者不可谏，来者犹可追。已而！已而！今之从政者殆而！”孔子下，欲与之言。趋而辟之，不得与之言。
- (六)长沮、桀溺耦而耕，孔子过之，使子路问津焉。长沮曰：“夫执舆者为谁？”子路曰：“为孔丘。”曰：“是鲁孔丘与？”曰：“是也。”曰：“是知津矣。”问于桀溺。桀溺曰：“子为谁？”曰：“为仲由”。曰：“是鲁孔丘之徒与？”对曰：“然。”曰：“滔滔者天下皆是也，而谁以易之？且而与其从辟人之士也，岂若从辟世之士哉？”耨而不辍。子路行以告。夫子怃然曰：“鸟兽不可与同群，吾非斯人之徒与而谁与？天下有道，丘不与易也。”
- (七)子路从而后，遇丈人，以杖荷蓑。子路问曰：“子见夫子乎？”丈人曰：“四体不勤，五谷不分，孰为夫子？”植其杖而芸。子路拱而立。止子路宿，杀鸡为黍而食之，见其二子焉。明日，子

路行以告。子曰：“隐者也。”使子路反见之。至，则行矣。子路曰：“不仕无义。长幼之节，不可废也；君臣之义，如之何其废之？欲洁其身，而乱大伦。君子之仕也，行其义也。道之不行，已知之矣。”

(八)逸民：伯夷、叔齐、虞仲、夷逸、朱张、柳下惠、少连。子曰：

“不降其志，不辱其身，伯夷、叔齐与！”谓“柳下惠、少连，降志辱身矣，言中伦，行中虑，其斯而已矣。”谓“虞仲、夷逸，隐居放言，身中清，废中权。我则异于是，无可无不可。”

(九)大师挚适齐，亚饭干适楚，三饭缭适蔡，四饭缺适秦，鼓方叔入于河，播武入于汉，少师阳、击磬襄入于海。

(十)周公谓鲁公曰：“君子不施其亲，不使大臣怨乎不以。故旧无大故，则不弃也。无求备于一人！”

(十一)周有八士：伯达、伯适、仲突、仲忽、叔夜、叔夏、季随、季駟。

## ◎子张篇第十九

(一)子张曰：“士见危致命，见得思义，祭思敬，丧思哀，其可已矣。”

(二)子张曰：“执德不弘，通道不笃，焉能为有？焉能为亡？”

(三)子夏之门人问交于子张。子张曰：“子夏云何？”对曰：“子夏曰：『可者与之，其不可者拒之。』”子张曰：“异乎吾所闻：君子尊贤而容众，嘉善而矜不能。我之大贤与，于人何所不容？我之不贤与，人将拒我，如之何其拒人也？”

(四)子夏曰：“虽小道，必有可观者焉；致远恐泥，是以君子不为也。”

(五)子夏曰：“日知其所亡，月无忘其所能，可谓好学也已矣。”

(六)子夏曰：“博学而笃志，切问而近思，仁在其中矣。”

(七)子夏曰：“百工居肆以成其事，君子学以致其道。”

(八)子夏曰：“小人之过也必文。”

(九)子夏曰：“君子有三变：望之俨然，即之也温，听其言也厉。”

(十)子夏曰：“君子信而后劳其民，未信则以为厉己也。信而后谏，未信则以为谤己也。”

(十一)子夏曰：“大德不逾闲，小德出入可也。”

(十二)子游曰：“子夏之门人小子，当洒扫应对进退，则可矣，抑末也。本之则无，如之何？”子夏闻之，曰：“噫！言游过矣！君子之道，孰先传焉，孰后倦焉？譬诸草木，区以别矣。君子之道，焉可诬也？有始有卒者，其惟圣人乎！”



(十三)子夏曰：“仕而优则学，学而优则仕。”

(十四)子游曰：“丧致乎哀而止。”

(十五)子游曰：“吾友张也为难能也，然而未仁。”

(十六)曾子曰：“堂堂乎张也，难与并为仁矣。”

(十七)曾子曰：“吾闻诸夫子：人未有自致者也，必也亲丧乎！”

(十八)曾子曰：“吾闻诸夫子：孟庄子之孝也，其他可能也；其不改父之臣与父之政，是难能也。”

(十九)孟氏使阳肤为士师，问于曾子。曾子曰：“上失其道，民散久矣。如得其情，则哀矜而勿喜！”

(廿)子贡曰：“纣之不善，不如是之甚也。是以君子恶居下流，天下之恶皆归焉。”

(廿一)子贡曰：“君子之过也，如日月之食焉；过也，人皆见之；更也，人皆抑之。”

(廿二)卫公孙朝问于子贡曰：“仲尼焉学？”子贡曰：“文、武之道，未坠于地，在人。贤者识其大者，不贤者识其小者。莫不有文武之道焉。夫子焉不学？而亦何常师之有？”

(廿三)叔孙武叔语大夫于朝，曰：“子贡贤于仲尼。”子服景伯以告子贡。子贡曰：“譬之宫墙，赐之墙也及肩，窥见室家之好。夫子之墙数仞，不得其门而入，不见宗庙之美，百官之富。得其门者或寡矣。夫子之云，不亦宜乎！”

(廿四)叔孙武叔毁仲尼。子贡曰：“无以为也！仲尼不可毁也。他人之贤者，丘陵也，犹可逾也；仲尼，日月也，无得而逾焉。人虽欲自绝，其何伤于日月乎？多见其不知量也。”

(廿五)陈子禽谓子贡曰：“子为恭也，仲尼岂贤于子乎？”子贡曰：“君子一言以为知，一言以为不知，言不可不慎也。夫子之不可及也，犹天之不可阶而升也。夫子之得邦家者，所谓立之斯立，道之斯行，绥之斯来，动之斯和。其生也荣，其死也哀。如之何其可及也？”

## ◎尧曰篇第二十

(一)尧曰：“咨！尔舜。天之历数在尔躬，允执其中。四海困穷，天禄永终。”舜亦以命禹。曰：“予小子履，敢用玄牡，敢昭告于皇皇后帝：有罪不敢赦。帝臣不蔽，简在帝心。朕躬有罪，无以万方；万方有罪，罪在朕躬。”周有大赉，善人是富。“虽有周亲，不如仁人。百姓有过，在予一人。”谨权量，审法度，修废官，四方之政行焉。兴灭国，继绝世，举逸民，天下之民归心焉。所重：民、食、丧、祭。宽则得众，信则民任焉，敏则有功，公则说。

(二)子张问于孔子曰：“何如斯可以从政矣？”子曰：“尊五美，屏四恶，斯可以从政矣。”子张曰：“何谓五美？”子曰：“君子惠而不费，劳而不怨，欲而不贪，泰而不骄，威而不猛。”子张曰：“何谓惠而不费？”子曰：“因民之所利而利之，斯不亦惠而不费乎？择可劳而劳之，又谁怨？欲仁而得仁，又焉贪？君子无众寡，无小大，无敢慢，斯不亦泰而不骄乎？君子正其衣冠，尊其瞻视，俨然人望而畏之，斯不亦威而不猛乎？”子张曰：“何谓四恶？”子曰：“不教而杀谓之虐；不戒视成谓之暴；慢令致期谓之贼；犹之与人也，出纳之吝谓之有司”。

(三)孔子曰：“不知命，无以为君子也；不知礼，无以立也；不知言，无以知人也。”